



Vischnaunca Tujetsch
Gemeinde Tujetsch

Invitaziun

16. Radunonza dil cussegl da vischnaunca

dil trienni 2017/2020

mesjamna, ils 20 da november 2019 allas 20.00 uras
ella Sala Cristalla a Sedrun

Tractandas:

1. Avertura
2. Lescha davart l'energia alpina dalla vischnaunca Tujetsch (lescha energia alpina)
3. Orientaziuns
4. Varia

Suprastonza communal Tujetsch

President communal
Beat Roeschlin

Menader center communal
Simon Collenberg



Cussegl da vischnaunca
2017/2020

Lescha davart l'energia alpina dalla vischnaunca Tujetsch (lescha energia alpina)

Messadi

dalla suprastonza communal a cussegl da vischnaunca

Preziau president
Preziadas cusseglieras
Stimai cussegliers

1. Situaziun da partenza

L'incumbensa dall'energia alpina enviers la vischnaunca da Tujetsch vegn reglada oz entras las statutas ed ina cunvegna da prestaziun. La cunvegna da prestaziun denter l'energia alpina e la vischnaunca Tujetsch ei vegnida visada entras la vischnaunca silla fin digl onn 2018. El rom dil transferiment dall'antieriura Ovra electrica Tujetsch (OET) en in'instituziun independenta dil dretg public che ha giu liug igl onn 2005 ei quella cunvegna da prestaziun vegnida elavurada ed approbada. Era las statutas dall'energia alpina ein vegnidadas relaschadas da quei temps (messadis per la radunonza da vischnaunca dils 12 da november 2004 e per la votaziun all'urna dils 28 da november 2004). Quellas ein vegnidadas revedidas ed approbadas entginas gadas entras la radunonza da vischnaunca.

La vischnaunca da Tujetsch ei tenor ils artechels 50 e 51 dalla nova lescha cantunala da vischnauncas (DG 175.050) ch'ei ida en vigur l'entschatta fenadur 2018, obligada da surveglar las interpresas externas che adempleschan incumbensas per la vischnaunca. Ord quei motiv ha la suprastonza communal decidiu da prender detagliadamein sut la lupa la relaziun giuridica denter la vischnaunca Tujetsch e l'energia alpina. En quei connex ha ella constatau ch'ei ha dau ils davos onns grondas ed impurtontas midadas tier la legislaziun cantunala e federala, sin las qualas las statutas e la cunvegna da prestaziun sebasan. La lescha federala davart il provediment d'electricitad sco era la lescha corrispundenta dil cantun Grischun ein idas igl onn 2008 en vigur (DG 812.100). Cheutras ei la fiera libra vegnida aviarta parzialmein per ils consuments finals che basegnan per onn sur 100'000 kilowat per ura. Da l'autra vart ein las interpresas ch'ei responsablas per il provediment d'electricitad suttamessas dapi allura a strictas prescripziuns regulatoricas. Da menziunar ei era la strategia d'energia 2050 dalla Confederaziun ch'ei vegnida approbada avon dus onns. Quella cumpeglia medemamein finamiras e mesiras per las energias regenerablas sco era per la reit da provediment. Tenor las informaziuns actualas savein nus ir da quei anora ch'il marcau da fiera vegn aviarts cumpleinamein per tuts consuments finals ils proxims onns.

Sin fundament da tut quellas midadas essenzialas ch'ei seresultadas ils davos onns sil marcau dalla forza electrica en Svizra e pervia dallas grondas provocaziuns che sedattan cheutras pil futur ei la suprastonza communal – ord vesta dalla vischnaunca sco proprietaria dall'interpresa – stada dall'idea d'elavurar novs documents che reglan la relaziun giuridica denter la vischnaunca Tujetsch e l'energia alpina. Ils responsabels dalla vischnaunca e dall'energia alpina han redeggiu comunablamein ils documents necessaris. Quels corrispundan al stadi actual dallas determinaziuns cantunalas e federalas vertentas, risguardan il svilup dil futur e reglan clar sco era transparent las responsabladads denter la proprietaria e l'energia alpina.

2. Documents

Tenor ina retscherca disponan pliras vischnauncas el cantun Grischun e plirs marcaus en Svizra davart ina lescha per lur ovras electricas. Per in'instituziun independenta dil dretg public ei ina lescha la fuorma usitada. Plinavon eisi usitau che la proprietaria relai ina strategia e stipulescha in contract da concessiun cun sia interpresa. Sin fundament da quellas

constataziuns han ils responsabels dall'energia alpina e la suprastanza communal redeggiu communablamein in pachet da documents che cumpeglia ina strategia dalla proprietaria, ina lescha sco era in contract da concessiun.

Tenor la grafica silla proxima pagina ei la strategia dalla proprietaria surordinada. Silsuenter suonda la lescha, ella quala pliras directivas ch'ei d'observar tier l'elavuraziun dil contract da concessiun ein stipuladas.

2.1 Strategia dalla proprietaria

La strategia dalla proprietaria (vischnaunca Tujetsch) vegn relaschada ed approvada entras la suprastanza communal. Ei setracta cheu d'in instrument strategic. Ella strategia scriva la suprastanza communal avon certas directivas per mauns dil cussegl d'administraziun dall'energia alpina. La strategia cumpeglia denter auter las finamiras dil menaschi sco era las finamiras economicas e socialas che l'energia alpina ei obligada d'ademplier. Plinavon ein pliras prescripziuns el connex culla survigilanza da quell'interpresa entras la suprastanza communal ed il cussegl da vischnaunca cuntenidas ella strategia dalla proprietaria.

2.2 Lescha – energia alpina

La nova lescha remplazza las statutas existentas dall'energia alpina sco era la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricidad. Ella fuorma la basa legala per l'incumbensa communal d'in segir provediment d'electricidad e per la gestiun d'ina reit d'electricidad sin territori communal che la vischnaunca ha surdau all'energia alpina. Ella lescha eisi ord quei motiv circumscret co l'interpresa independenta ei organisada e davart tgei cumpetenzas che quella dispona. Plinavon eisi stipulau ella lescha tgei organs comunals ch'ei responsabels per la strategia dalla proprietaria e survigileschan che l'incumbensa publica vegni ademplida correctamein tenor uorden. Medemamein cumpeglia la lescha las directivas ch'ei d'observar tier l'elavuraziun dil contract da concessiun, il qual la suprastanza communal siara giu cull'energia alpina. Il cuntegn dalla lescha vegn descrets detagliadamein el capetel 3.

2.3 Contract da concessiun

El contract da concessiun vegnan oravontut las prestaziuns che l'energia alpina ei obligada da porscher definidas el detagl. Denter auter ei l'energia alpina responsabla per la gestiun d'ina reit d'electricidad e per la furniziun d'electricidad. Medemamein procura ella sin incarica dalla vischnaunca da Tujetsch per in'illuminaziun publica adeguata. Ils dretgs che l'energia alpina ha sin territori communal ein medemamein stipulai el contract, per exempel il dretg per far diever dil terren public. Plinavon ein las indemnisaziuns che la vischnaunca Tujetsch ha dabien dall'energia alpina menziunadas el contract.



3. Midadas enviers las statutas

En quei capetel vegnan las impurtontas midadas enviers las statutas existentas descrettas el detagl.

3.1 Declaraziuns tier las midadas

Suprastonza communal

Sin fundament digl artechel 51 dalla lescha da vischnauncas dil cantun Grischun (DG 175.050) ei la vischnaunca Tujetsch obligada da survigilar l'energia alpina. La tendenza ei oz aschia ch'ils organs executorics, tier nus pia la suprastonza communal, ein responsabels pils instruments da direger e survigilar las instituziuns independentas dil dretg public. Ord quei motiv eisi vegniu stipulau ella lescha (artechel 14) che la suprastonza communal ei responsabla per l'incumbensa dalla survigilanza e s'engascha sco representanta dalla proprietaria dall'energia alpina pils interess dalla vischnaunca. Per quels intents fixescha ella la strategia dalla proprietaria. Quellas impurtontas incumbensas eran stipuladas negliu entochen oz. La posiziun dalla suprastonza communal vegn cheutras extendida e rinforzada.

Cussegl d'administraziun

Sin fundament dallas statutas existentas vegnan ils commembers dil cussegl d'administraziun elegi a caschun dalla radunonza da vischnaunca (novas statutas dils 01-07-2017). Tochen igl onn 2016 succedeva quei entras ina votaziun all'urna. L'elecziun alla radunonza vischnaunca ni entras ina votaziun all'urna ei prevedida ed adattada pils organs politics en vischnaunca ni sin palancau cantunal e federal, denton buca pils gremis d'ina interpresa autonoma dil dretg public che funcziunescha tenor principis economics. Il cantun Grischun posseda pliras instituziuns autonomas dil dretg public sco la Banca Cantunala, la cassa da pensiun cantunala e la segirada da baghetgs dil cantun. Tier las instituziuns menziunadas elegia la Regenza il cussegl da banca respectivamein ils cussegls d'administraziun. Pli baul elegeva il Cussegl grond per exempel il cussegl da banca. Quella regulaziun ha il Cussegl grond denton aboliu e surdau quella cumpetenzza alla Regenza. Era en vischnauncas ch'ei en possess d'interpresas

autonomas dil dretg public han las suprastonzas communalas quellas cumpetenzas. Sin fundament da quellas experientschas e quella tendenza generala preveda la nova lescha che la suprastonza communal elegia ils commembers dil cussegl d'administraziun sco era il president ed il vicepresidente. Cheutras eisi garantiu che la suprastonza communal – la quala s'engascha pils interess e fixescha la strategia dalla proprietaria – sa occupar il cussegl d'administraziun cun commembers che disponan davart las habilitads ed experientschas necessarias e van d'accord culla strategia dalla proprietaria. La suprastonza ha actualmein dretg sin in sez el cussegl d'administraziun, il president communal fa mintgamai part a quei gremi. La lescha preveda niev che tochen dus commembers dalla suprastonza communal san far part al cussegl d'administraziun, quei tut tenor la constellaziun. Damai che la vischnaunca ei proprietaria dall'energia alpina eisi giustificau che tochen duas persunas dalla suprastonza communal astgan appartener a quei gremi. Las elecziuns dil cussegl d'administraziun succedan mintgamai a caschun dalla tractaziun dil quen e dil rapport annual.

Post da revisiun

Niev elegia la suprastonza communal il post da revisiun. Tochen oz vegneva quei gremi elegius a caschun dalla radunonza da vischnaunca dall'energia alpina. Plinavon eisi stipulau ella lescha ch'il medem post da revisiun sa surprender l'incarica (revisiun) per in spazi da maximalmein siat onns, sch'ils onns d'uffeci suondan in suenter l'auter. Sin fundament da quella nova regulaziun han ils responsabels dall'energia alpina e la suprastonza l'intenziun d'ademplier ils criteris dalla "Compliance" el connex cullas directivas dalla "Public Corporate Governance". L'elecziun dil post da revisiun succeda mintgamai a caschun dalla tractaziun dil quen e dil rapport annual.

Cumpetenzas finanzialas – Suprastonza communal e cussegl d'administraziun

En cumparegliaziun cullas statutas existentas ein las cumpetenzas finanzialas dil cussegl d'administraziun vegnidas adattadas. Tenor las statutas sa il cussegl d'administraziun decider sur da tuttas expensas. La nova lescha preveda che la suprastonza decida sper il cussegl d'administraziun davart fatschentas che survargan ina certa summa.

La lescha preveda ch'il cussegl d'administraziun sa decider sur da tuttas expensas en rama dil preventiv global e dil preventiv d'investiziuns. Plinavon san ils commembers dil cussegl d'administraziun decider sur d'expensas unicas buca previdas tochen frs. 300'000.00 ed expensas regularas tochen frs. 100'000.00 per cass. La summa totala ei denton restrenschilda. Quella munta per expensas unicas a frs. 500'000.00 e per expensas regularas a frs. 200'000.00. Sur d'expensas che schaian ord quella rama, decida la suprastonza communal.

L'intenziun da quella regulaziun ei ch'il cussegl d'administraziun duei saver decider en atgna reschia sur dalla maioritad dallas fatschentas, nua ch'ei seresulta expensas ordeifer ils preventivs. Sin fundament da lur savida ed investa ell'interpresa san els giudicar il meglier sche quellas expensas ein prudentas. La suprastonza communal ch'ei era representada el cussegl d'administraziun, vegn informada sur da talas expensas. Il brat d'informaziuns ei aschia garantius. Pér cura ch'ils credits survargan la summa menziunada, ha la suprastonza communal da tractar las fatschentas e da decider, sch'ella vul conceder ils credits corrispundents. Ella vegn pia allura en funcziun, cura che las expensas buca previdas han ina

certa influenza sils quens (quen da gudogn e sperdita / quen d'investiziuns) dall'energia alpina. Vinavon lubescha quella regulaziun al cussegl d'administraziun da saver agir a moda sperta tier la maiortad dallas fatschentas, nua che expensas supplementaras seresultan. Ord vesta dils responsabels dall'energia alpina eisi numnadamein impurtont ch'els san agir spert. Tier certas incaricas seresultan expensas buca previdas sco per exempel pil material. Quella regulaziun possibilitescha all'energia alpina da conceder ils credits corrispundents ed aschia saver surpender immediat talas incaricas.

Preventiv

L'approbaziun dils preventivs schai tenor las statutas vertentas en cumpetenza dil cussegl d'administraziun. La nova lescha preveda che la suprastonza communal aprobescha il preventiv global ed il preventiv d'investiziuns. Cheutras vegn la suprastonza informada davart las expensas annualas (preventiv) e sur dallas investiziuns planisadas. Ils preventivs ein in impurtont instrument per la planisaziun finanziaria digl onn vegnent. Ord quei motiv eisi prudent che quels documents vegnan approbai entras la suprastonza communal sco representanta dalla proprietaria.

Quen e rapport annual

Tochen oz vegnevan il quen ed il rapport annual approbai a caschun dalla radunonza da vischnaunca dall'energia alpina senza ch'il cussegl da vischnaunca stueva predeliberar quella fatschenta. Per la tractaziun dil quen e dil rapport annual ei niev il cussegl da vischnaunca responsabels, quei tenor la medema regulaziun sco il cussegl da vischnaunca aprobescha il quen annual ed il rapport da vischnaunca. Sin proposta dalla suprastonza communal decida quei gremi medemamein sur dalla l'utilisaziun dil gudogn dall'energia alpina. Quella midada ha per consequenza ch'il cussegl da vischnaunca vegn da niev mintgamai informaus sur dils quens da fatschenta e sa aschia far persenn co ei stat culla situaziun finanziaria ed il svilup dall'energia alpina. En quei connex sa il cussegl da vischnaunca pretender plaid e fatg dalla suprastonza communal sur dalla strategia dalla proprietaria ni sur da fatschentas sco era dar giu recumandaziuns per la gestiun dall'interpresa. Entras l'approbaziun dil quen e dil rapport annual surpren il cussegl da vischnaunca sco representant dalla proprietaria dall'energia alpina era la funcziun da survigilanza enviars la suprastonza communal.

Vendita ed externalisaziun

Sur dalla vendita dall'energia alpina ni da spartas da quell'interpresa decidan ils votants e las votantas era egl avegnir all'urna. Sur dil transferiment da spartas dall'interpresa en interpresas independentas dil dretg public ni privat decida la radunonza communal. Quei ei ina nova amplificaziun enviars las statutas existentas. Tenor las statutas decida il cussegl d'administraziun davart la vendita da participaziuns. Egl avegnir vegnan ils gremis politics a decider sur da tals affars sco era sur dalla vendita da spartas acquistadas d'altres interpresas, quei tenor igl uorden da cumpetenzas dalla constituziun communal. Quels affars san numnadamein ver consequenzas silla situaziun finanziaria dall'energia alpina. Ord quei motiv eisi cunvegnent da suttametter quellas fatschentas als gremis politics. Vinavon eisi aschia che l'energia alpina sa decider sur dalla cumpra d'altres interpresas ni da participaziuns a talas.

3.2 Survesta – cumpetenzas dils gremis

Ella tabella cheusut ein las cumpetenzas dils differents gremis ch'ei vegnidas declaradas el text aunc inagada indicadas. Sco igl ei veseivel ha la suprastonza communal sco era il cussegl da vischnaunca retschert entginas novas cumpetenzas.

Cumpetenzas	Cussegl d'administraziun	Suprastonza communal	Cussegl da vischnaunca	Radunonza da vischnaunca	Urna
Cumpetenzas generalas					
Survigilanza dall'energia alpina		N			
Relaschar la strategia dalla proprietaria		N			
Approbaziun dil preventiv	V	N			
Approbaziun dil preventiv d'investiziuns	V	N			
Approbaziun dil quen e dil rapport annual			N	V	
Approbaziun dall'utilisaziun dil gudogn			N	V	
Vendita ed externalisaziun					
Vendita dall'energia alpina ni da spartas da tala					V/ N
Vendita da spartas acquistadas d'autras interpresas		N*	N*	N*	N*
Vendita da participaziuns	V	N*	N*	N*	N*
Transferiment da spartas dall'interpresa en interpresas independentas dil dretg public u privat				N	
Eleccziuns					
Cussegl d'administraziun		N			V
Post da revisiun		N		V	

V=tochen oz (tenor las statutas dils 01-07-2019)

N=niev naven dils 01-01-2020 / * tenor las cumpetenzas dalla constituziun communal (tenor la nova lescha)

4. Commentaris tier ils artechels dalla lescha

Quei capetel cumpeglia in commentari tier mintga artechel dalla lescha.

Artechel 1

Tuttina sco artechel 1 dallas statutas.

Artechel 2

Igl intent dall'energia alpina ei descrots ella cunvegna da prestaziun ch'ei currida giu. Da niev cuntegn la lescha quei artechel. L'incumbensa publica che la vischnaunca sto ademplier el rom dall'avertura tenor la planisaziun dil territori (mira artechel 3 dalla lescha davart il provediment d'electricitad dil cantun Grischun, dr 812.100) cumpeglia la construcziun, il manteniment e la gestiun dallas reits da distribuziun electricas. Perquei eisi impurtont che quell'incumbensa vegn stipulada sper las ulteriuras en ina lescha.

Artechel 3

Ellas statutas (artechel 2) e la cunvegna da prestaziun ein las incumbensas stipuladas. Las incumbensas vegnan niev explicadas en quei artechel.

Artechel 4

Niev: Gl'artechel regla il possess dall'energia alpina el detagl.

Artechel 5

Niev: Igl ei stau necessari da stipular l'economisaziun da quell'energia ella lescha, tochen oz era quei reglau ella cunvegna da prestaziun.

Artechel 6

Il principis da fatschenta vegnan menziunai. Plinavon vegn il brat d'indicaziuns explicaus en quei artechel. Quei punct era descrets negliu entochen oz. Medemamein eisi stipulau egl artechel che l'energia alpina sa colaborar cun autras firmas, acquistar interpresas ni separticipar a talas. Quei ei per part gia reglau egl artechel 2 dallas statutas, denton buca el detagl.

Artechel 7

Niev: Sin fundament da quei artechel sa l'energia alpina porscher prestaziuns en differentas spartas sco era en autras vischnaucas.

Artechel 8

Niev: La finamira dall'energia alpina ei da contonscher in gudogn da fatschenta.

Artechel 9

L'incumbensa dil provediment d'electricidad ei descretta ellas statutas sco era ella cunvegna. Da niev vegn quei impurtont pensum dall'energia alpina menziunaus ella lescha.

Artechel 10

Quella incumbensa ei menziunada ellas statutas sco era ella cunvegna da prestaziun. Da niev vegn era quell'incumbensa stipulada ella lescha.

Artechel 11

Niev: La producziun d'energia che cumpeglia denter auter la reit d'anergia ni las ovras vegn entras quei artechel reglada ella lescha.

Artechel 12

Niev: Sin fundament da quei artichel ei l'energia alpina legitimada da porscher sper il provediment e la distribuziun d'electricitad ulteriuras prestaziuns en differentas spartas sco communicaziun, electromobilitad, energias regenerablas eav. Era l'incumbensa dall'illuminaziun che era tochen oz reglada ella cuvegna da prestaziun, ei explicada en quei artichel.

Artechel 13

Niev: declaraziuns el capitel 3.

Artechel 14

Niev: declaraziuns el capitel 3.

Artechel 15

Niev: Actualmein secumpona il cussegl d'administraziun da treis commembers. Per decisiuns valeivlas tonscha ei sche dus commembers ein presents alla seduta. Quella constellaziun sa caschunar problems. Ei sa dar situaziuns da pat. Plinavon ein decisiuns e posiziuns che tschun persunas han deliberau pli diversas, ulivadas ed argumentadas e la controlla e l'indipendenza enviers la direcziun e la fatschenta crescha. Il diember da treis commembers para en quei senn buca d'esser en mintga grau ideals. Da niev duei perquei la suprastanza communal saver occupar il cussegl d'administraziun cun treis entochen tschun commembers. Ulteriuras declaraziuns ein explicadas el capitel 3.

Artechel 16

Niev: Cun fixar il temps d'uffeci sin in onn ei la suprastanza communal sco gremi electoral pli libra e flexibla d'occupar il cussegl d'administraziun tenor ils basegns ed interess dalla proprietaria. Aschia prevedan era biaras interpresas dil dretg privat in temps d'uffeci d'in onn sco per exempel las Pendicularas Andermatt-Sedrun SA. Per la fatschenta sezza ha quei fatg negins disavantatgs. Ulteriuras declaraziuns ein explicadas el capitel 3.

Artechel 17

Niev: Tenor las statutas ei il cussegl d'administraziun cumpetents da decider sche dus da treis commembers ein presents. La nova lescha preveda che treis commembers ston esser presents per decider, sch'il gremi consista da treis ni quater persunas. Secumpona il gremi da tschun persunas, ston quater commembers far part alla seduta.

Artechel 18

Niev: Quei artichel regla las cumpetenzas dil cussegl d'administraziun. Da niev ein las cumpetenzas finanzialas limitadas tier quei gremi. Quei ei oz buca il cass. Plinavon preveda la nova lescha ch'il cussegl d'administraziun sa buca approbar ils preventivs sco era buca decider sur dalla vendita da participaziuns, quei ch'el sa oz sin fundament dallas statutas existentas. Il

cussegl d'administraziun dispona tenor la nova lescha da tuttas ulteriuras cumpetenzas ch'ei
buca surdadas ad auters organs.

Artechel 19

Niev: declaraziuns el capetel 3.

Artechel 20

Niev: declaraziuns el capetel 3.

Artechel 21

Tuttina sco tochen da cheu, stipulau da niev ella lescha.

Artechel 22

Tuttina sco tochen da cheu, stipulau da niev ella lescha.

Artechel 23

Tuttina sco tochen da cheu, stipulau da niev ella lescha.

Artechel 24

Niev: declaraziuns el capetel 3.

Artechel 25

Tuttina sco tochen da cheu, stipulau da niev ella lescha.

Artechel 26

Tuttina sco tochen da cheu, stipulau da niev ella lescha.

Artechel 27

Niev: Il capital da dotaziun sto l'energia alpina impunder per ademplir sias incumbensas. Ils indrezs d'infrastructura ch'ei en possess dall'energia alpina vegnan menziunai en quei artechel.

Artechel 28

Tuttina sco tochen da cheu, stipulau da niev ella lescha.

Artechel 29

Certas adattaziuns: declaraziuns el capetel 3.

Artechel 30

Tuttina sco tochen da cheu, stipulau da niev ella lescha.

Artechel 31

Tuttina sco tochen da cheu, stipulau da niev ella lescha.

Artechel 32

Tuttina sco tochen da cheu, stipulau da niev ella lescha.

Artechel 33

Tuttina sco tochen da cheu, stipulau da niev ella lescha.

Artechel 34

Tuttina sco tochen da cheu, stipulau da niev ella lescha.

Artechel 35

La nova lescha remplazza la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricidad. Ella cuntegn ina rama per la taxa annuala. Il cussegl da vischnaunca fixescha la taxa eifer quella rama. Cun quella regulaziun sto buca mintgamai la lescha vegnir revidida, sche la taxa vegn adattada, quei ch'ei ina megliaera sligiazion sco era in model secumprovau.

Artechel 36

La vischnaunca sco concessionaria sa pretender adattaziuns. Quella adattaziun vegn fixada tenor art. 35 entras il cussegl da vischnaunca.

Artechel 37

Tuttina sco tochen da cheu (artechel 16 dallas statutas), stipulau da niev ella lescha.

Artechel 38

Niev: disposiziun formala.

Artechel 39

Decisiva per interpretar la lescha dall'energia alpina ei la versiun romontscha.

Artechel 40

La lescha remplazza las statutas dall'energia alpina dils 01-07-2019 e la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricidad dils 16-03-2018.

5. Ulteriurs pass e facit

La nova lescha ei la basa legala per l'elavuraziun dil contract da concessiun che vegn approbaus silsunter dalla suprastanza communal. El contract da concessiun definescha la suprastanza communal comunablaimein culs responsabels dall'energia alpina da niev las indemnizaziuns che la vischnaunca retscheiva dall'energia alpina. Plinavon fixescha la suprastanza communal ella strategia dalla proprietaria pliras directivas economicas che han ina influenza sil quen e la bilanza ed aschia era sill'indemnizaziun totala che vegn condeschida alla vischnaunca (niev model d'indemnizaziuns). Entochen da cheu secumponan las indemnizaziuns per la vischnaunca dalla taxa da concessiun per il diever dil terren communal, digl import per la vendita dallas energias da concessiun e participaziun dalla vischnaunca, dalla cumpart sviulta ord la producziun dall'energia alpina, dalla cumpart sviulta dall'energia e dalla cumpart vid il gudogn annual. Tut quellas posiziuns vegnan examinadas el rom dall'elavuraziun dil niev model d'indemnizaziuns. Nua ch'ei fa basegns vegnan novas directivas definidas, p. ex. per la cumpart vid il gudogn. L'idea ei ch'il niev model d'indemnizaziuns sebase sin parameters capeivels che dattan ina certa segirtad da planisar e calcular, quei schibein per la proprietaria sco era per l'interpresa.

Sin fundament dil niev model d'indemnizaziuns che vegn proximamein elavuraus quenta la suprastanza communal cun dapli entradas frs. tier il gudogn dall'energia alpina. Actualmein munta quell'indemnizaziun a frs. 600'000.00. El preventiv 2020 ha la suprastanza budgetau ina summa da frs. 900'000.00 tier quella posiziun (nr. 9505.4120.04 el quen da gudogn e sperdita). Ei setracta cheu d'ina summa approximativa. Plinavon vegnan ils responsabels ad examinar el rom dall'elavuraziun dil niev model d'indemnizaziuns, schebein la taxa annuala che l'energia alpina adossescha als consuments finals per far diever dil funs e terren public el connex culla construcziun ed il menaschi dalla reit per la distribuziun d'electricitad duei vegnir alzada. Quei havess per consequenza che quellas entradas s'augmentassen (nr. 9505.4120.03 el quen da gudogn e sperdita). Quella taxa munta pil mument a 0.6 raps per ura kilowat. Tenor la nova lescha eisi pusseivel d'augmentar quella taxa sin maximalmein 2.4 raps per ura kilowat. Il cussegl da vischnaunca ei cumpetents da decider sur da talas adattaziuns. Pil mument seresultan entradas da totalmein frs. 130'000.00 per la vischnaunca sin fundament da quella taxa.

Las contractivas el connex cull'elavuraziun dil niev contract da concessiun han liug suenter l'approbaziun dalla nova lescha. Ord vesta dalla suprastanza communal eisi da gronda impurtonza che l'energia alpina sa finanziar siu menaschi era egl avegnir. Ord quei motiv vegn ella a procurar ch'il niev model d'indemnizaziuns che vegn definius el contract da concessiun pren risguard sils basegns finansials dall'energia alpina. L'energia alpina duei numnadamein saver sesviluppar vinavon ed esser habla da far las investiziuns necessarias egl avegnir.

La suprastanza communal engrazia al cussegl d'administraziun ed alla direcziun dall'energia alpina per las sedutas constructivas che han giu liug duront ils davos meins el connex cull'elavuraziun dalla nova lescha. Entras l'applicaziun dil niev model da cumpetenzas ch'ei stipulaus ella nova lescha seresulta in pli intensiv brat d'informaziuns denter la vischnaunca e l'energia alpina. Quei ei ord vesta dils responsabels dall'energia alpina e dalla suprastanza communal il grond avantatg che sedat culla nova lescha.

Il responsabel dall'energia alpina sco era la suprastanza communal stattan davos la nova lescha e proponan al cussegl da vischnaunca ed alla radunonza da vischnaunca d'approbar ella, aschia che las contractivas el connex cul niev contract da concessiun sa beinspért vegnir lantschadas.

6. Proposta

Sebasond sin las suranumnadas ponderaziuns propona la suprastanza communal al cussegl da vischnaunca

- a) **d'approbar la lescha davart l'energia alpina dalla vischnaunca Tujetsch (lescha energia alpina).**

- b) **d'abolir las statutas dall'energia alpina digl 01-07-2017 e la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricitad dils 16-03-2018.**

La fatschenta vegn aunc suttamessa alla radunonza da vischnaunca.

Suprastanza communal Tujetsch



President communal
Beat Roeschlin



Menader center communal
Simon Collenberg

Aschunta:

- Lescha energia alpina



**Lescha davart l'energia alpina
dalla vischnaunca Tujetsch (lescha energia alpina)**

**Approbada entras la radunonza da vischnaunca dils....
Entrada en vigur:**

TABLA DA CUNTEGN

I. Determinaziuns generalas

- Art. 1 energia alpina
- Art. 2 Intent
- Art. 3 Incumbensas
- Art. 4 Relaziuns da proprietad
- Art. 5 Energia da participaziun e da concessiun

II. Incumbensa dil provediment d'energia

A. Principis el rom dalla purschida da prestaziuns

- Art. 6 Principis da fatschenta
- Art. 7 Camps d'activitad
- Art. 8 Finamiras economicas

B. Incumbensa da prestaziun per singulas spartas

- Art. 9 Provediment d'electricitad
- Art. 10 Reits da distribuziun ed implonts
- Art. 11 Produenziun d'energia
- Art. 12 Ulteriuras prestaziuns

III. Organisaziun

A. Autoritads communalas

- Art. 13 Cussegl da vischnaunca
- Art. 14 Suprastonza communalala

B. Cussegl d'administraziun

- Art. 15 Cumposiziun
- Art. 16 Elecziuns
- Art. 17 Convocaziun
- Art. 18 Cumpetenzas ed incumbensas
- Art. 19 Cumpetenzas finanzialas
- Art. 20 Preventiv e quen annual

C. Direcziun

- Art. 21 Elecziun, cumposiziun e representanza
- Art. 22 Incumbensas
- Art. 23 Cumpetenzas finanzialas

D. Revisiun dil quen

- Art. 24 Il post da revisiun
- Art. 25 Examinaziun

E. Persunal

- Art. 26 Relaziun d'engaschament

IV. Principis dalla finanziaziun

A. En general

- Art. 27 Mieds finansials e possess
- Art. 28 Finanziaziun dil menaschi
- Art. 29 Vendita ed externalisaziun

B. Tariffas ed indemnisaziuns

- Art. 30 Principis
- Art. 31 Tariffas per prestaziuns publicas
- Art. 32 Colligiaziun vida la reit
- Art. 33 Indemnisiuns per prestaziuns commercialas

C. Rendaquen e concessiun

- Art. 34 Presentaziun dalla contabilitad
- Art. 35 Taxa da concessiun, calculaziun, object e subject
- Art. 36 Adattaziuns

V. Responsablada

- Art. 37 Responsablada

VI. Execuziun e disposiziuns finalas

- Art. 38 Execuziun
- Art. 39 Interpretaziun
- Art. 40 Entrada en vigur

I. Determinaziuns generalas

Art. 1 energia alpina

¹ L'energia alpina ei in'interpresa independenta dil dretg public (interpresa) dalla vischnaunca Tujetsch tenor igl artechel 50 ss. dalla lescha da vischnauncas dil cantun Grischun.

² L'interpresa ei sesenta a Tujetsch ed ei enscretta el register da commerci.

Art. 2 Intent

L'energia alpina ei responsabla pil provediment d'energia ch'ei stipulaus sco incumbensa communal. Ella ei responsabla per la produczion, la repartiziun e la distribuziun d'electricidad sco era per la construcziun ed il manteniment dall'infrastructura dalla reit resp. dils implonts electricis necessaris.

Art. 3 Incumbensas

¹ L'energia alpina procura sin basa dallas determinaziuns federalas e cantunalas dalla lescha davart il provediment d'electricidad per in provediment d'electricidad segir, economic e persistent da ses consumers finals sin siu intschess sco era per las reits ordeifer igl intschess da provediment.

² L'energia alpina sa porscher ulteriuras prestaziuns el sector dil provediment d'energia, ella sparta da comunicaziun sco era prestaziuns dalla reit e survetschs d'energia da tut gener.

³ L'energia alpina ademplescha las incumbensas surdadas ad ella sin fundament da questa lescha e dalla strategia dalla proprietaria.

Art. 4 Relaziuns da proprietad

Tier il possess dall'energia alpina s'audan las valurs da facultad ch'ei vegnidas surdadas ad ella en connex culla decisiun dalla radunonza da vischnaunca dils 12 da november 2004 sco era ils edificis ed ils indrezs che l'interpresa ha construuiu ed acquistau.

Art. 5 Energia da participaziun e da concessiun

Tenor il contract da concessiun stipulaus cullas Ovras electricas Rein Anterior (ORA) ha la vischnaunca dabien l'energia da participaziun e da concessiun. L'economisaziun dil quantum da quell'energia vegn reglada el contract da concessiun.

II. Incumbensa dil provediment d'energia

A. Principis el rom dalla purschida da prestaziuns

Art. 6 Principis da fatschenta

¹ L'energia alpina vegn administrada tenor principis economics, ecologics ed innovativs. Ella sedrezza suenter il svilup dalla branscha e dalla fiera.

² Per promover ed ademplir ils principis dall'instituziun independenta dil dretg public sa l'energia alpina collaborar cun autras interpresas dil dretg public ni dretg privat, acquistar quellas interpresas ni separar vida talas. Ella sa plinavon transferir atgnas spartas en autras interpresas independentas dil dretg public ni dretg privat. Quei tut sut la reserva digl artechel 29.

³ La vischnaunca Tujetsch e l'energia alpina mettan a disposiziun ina a l'autra gratuitamein indicaziuns ch'ei necessarias per ademplir las determinaziuns da questa lescha el rom dalla lescha davart la protecziun da datas.

Art. 7 Camps d'activad

¹ L'energia alpina ei legitimada da porscher prestaziuns commercialas ordeifer siu intschess da provediment. Ella sa gestiunar reits da distribuziun sin territoris d'autras vischnauncas. L'energia alpina ei obligada da stipular in contract da concessiun cullas vischnauncas, per las qualas ella surpren il provediment d'energia.

² L'energia alpina sa porscher prestaziuns per tiarzas persunas ella sparta dalla reit da distribuziun. Cheutier s'audan la construcziun ed il menaschi da reits sco era lavurs da manteniment vida talas.

Art. 8 Finamiras economicas

L'energia alpina ha l'intenziun da contonscher in gudogn da fatschenta.

B. Incumbensa da prestaziun per singulas spartas

Art. 9 Provediment d'electricidad

Tenor la lescha vertenta davart il provediment d'electricidad procura l'energia alpina sin siu intschess dalla reit pil provediment d'electricidad dils consuments finals.

Art. 10 Reits da distribuziun ed implonts

¹ L'energia alpina construescha, gestiunescha e mantegn las reits da distribuziun ch'ei necessarias pil provediment d'electricidad ed ulteriurs implonts.

² Las prestaziuns vegnan offeridas sin fundament dallas determinaziuns surordinadas dil dretg d'energia e tenor il stan dalla tecnologia ch'ei usitau ella branscha.

Art. 11 Produenziun d'energia

¹ L'energia alpina construescha, gestiunescha e mantegn ses implonts da produenziun d'energia.

² Ella sa separticipar alla construcziun dad implonts per la produenziun d'energia, cooperar cun tiarzas persunas el rom dalla produenziun d'energia e gestiunar implonts da tiarzas persunas.

Art. 12 Ulteriuras prestaziuns

¹ L'energia alpina ei legitimada da porscher prestaziuns commercialas ch'ei aschi profitablas sco pussivel. Quellas vegnan offeridas per prezis che cuvieran sil pli pauc ils cuosts e corrispundan alla strategia dalla proprietaria.

² Ellas suandontas spartas porscha l'energia alpina prestaziuns: installaziuns electricas, electroplani-saziuns, provediment da calira, survetschs d'energia, cussegliaziun ed informaziun. Ellas spartas comunicaziun, electromobilitad ed energias regenerablas sa ella medemamein porscher prestaziuns commercialas.

³ L'energia alpina procura per in'illuminaziun adattada dallas vias e dils plazs che secattan sigl intschess ed ein en possess dalla vischnaunca Tujetsch. Persuenter incassescha ella in'indemnisaziun corrispundenta.

III. Organisaziun

A. Autoritads communalas

Art. 13 Cussegl da vischnaunca

¹ Il cussegl da vischnaunca approbescha sin proposta dalla suprastanza communalala il quen ed il rapport annual sco era l'utilisaziun dil gudogn.

² Entras l'approbaziun dil quen e dil rapport annual dat il cussegl da vischnaunca descharscha als commembers dil cussegl d'administraziun da lur responsabladad.

Art. 14 Suprastanza communalala

¹ La suprastanza communalala approbescha il preventiv global ed il preventiv d'investiziuns dall'energia alpina.

² La suprastanza communalala s'engascha pils interess dalla proprietaria, determinescha la strategia dalla proprietaria, reveda quella periodicamein e presenta ella al cussegl da vischnaunca per enconuschientscha. La strategia dalla proprietaria vala sco basa e directiva per l'elavuraziun dil contract da concessiun, il qual la suprastanza communalala stipulescha cull'energia alpina.

³ La suprastanza communalala survigilescha l'energia alpina. Oravontut dat ella directivas che vegnan applicadas sche l'energia alpina ademplescha buca ni a moda meins cuntenteivla las finamiras ch'eiin cuntenidas ella strategia dalla proprietaria. La suprastanza communalala ei plinavon legitimada da prentender sclariments, da prender investa en tuttas actas necessarias sco era d'incumbensar il post da revisiun ni la cumissiun da gestiun dalla vischnaunca Tujetsch cun examinaziuns supplementaras.

B. Cussegl d'administraziun

Art. 15 Cumposiziun

¹ Il cussegl d'administraziun secumpona da treis tochen tschun commembers. Tut tenor la cumposiziun dil cussegl d'administraziun appartegnan ina tochen duas personas dalla suprastanza communalala al cussegl d'administraziun. Ils commembers dil cussegl d'administraziun ein buc obligai da prender domicil ella vischnaunca Tujetsch.

² Ils commembers dil cussegl d'administraziun ston ademplir las premissas tenor las determinaziuns dil dretg d'acziun.

Art. 16 Elecziuns

¹ La suprastanza communalala elegia ils commembers dil cussegl d'administraziun. Ella elegia plinavon ord siu miez in president ed in vicepresidente. Ultra da quei seconstituescha il cussegl d'administraziun sez.

² Las personas vegnan elegidas per ina perioda d'uffeci d'in onn. Ina reelecziun ei lubida.

³ Las elecziuns succedan annualmein a caschun dalla tractaziun dil quen e dil rapport annual.

Art. 17 Convocaziun

¹ Il cussegl d'administraziun salva sias sesidas aschi savens sco quei fa basegns sin fundament dallas fatschentas ni sche dus dils commembers giavischan ina sesida.

² Sch'el secumpona da treis ni quater personas, ei il cussegl d'administraziun cumpetents da decider, cura che treis commembers ein presents alla sesida. Sch'el secumpona da tschun personas, ston quater commembers far part alla sesida.

³ Tier votaziuns ed elecziuns decida la pluralitad dallas vuschs. En cass da paritad da vuschs, vala la vusch dil parsura sco vusch da tagl.

Art. 18 Cumpetenzas ed incumbensas

¹ Il cussegl d'administraziun dispona da tuttas cumpetenzas el rom dalla strategia dalla proprietaria, aschilunsch ch'ellas ein buca surdadas ad auters organs entras questa lescha ni la constituziun communal.

² Sin fundament da questa lescha e dalla strategia dalla proprietaria definescha il cussegl d'administraziun la politica dall'interpresa e pren decisiuns strategicas. Plinavon survigilescha el las mesiras pridias e controllescha l'execuziun ed ils resultats da talas e procura plinavon per in controlling adattau.

³ Il cussegl d'administraziun ei legitimaus da relaschar reglaments d'organisaziun, cundiziuns da fatschenta sco era directives ed ordinaziuns. En special determinescha el las cundiziuns da basa per la produziun, la cumpra ed il commerci cun electricitad sco era pils ulteriurs survetschs en quella sparta.

⁴ Sin basa dalla legislaziun pil providiment d'electricitad fixescha il cussegl d'administraziun las tariffas pil diever d'electricitad e per l'utilisaziun dalla reit sco era ils prezis pils survetschs d'energia.

Art. 19 Cumpetenzas finanzialas

¹ El rom dil preventiv global e dil preventiv d'investiziuns decida il cussegl d'administraziun definitivamein ed independent dalla summa sur d'expensas ch'ei necessarias per ademplir las finamiras dalla strategia dalla proprietaria.

² Il cussegl d'administraziun ei cumpetents da decider sur d'expensas unicas e buca budgetadas da tochen frs. 300'000.- sco era sur d'expensas che serepetan onn per onn da tochen frs. 100'000.- per in singul cass. La summa totala ei limitada a frs. 500'000.- per expensas unicas ed a frs. 200'000.- per expensas che serepetan onn per onn.

³ La suprastonza communal decida sur d'expensas unicas e buca budgetadas da varga frs. 500'000.- e sur d'expensas che serepetan onn per onn da varga frs. 200'000.-.

Art. 20 Preventiv e quen annual

Il cussegl d'administraziun presenta alla suprastonza communal il preventiv global ed il preventiv d'investiziuns. Plinavon suttametta el alla suprastonza communal il quen annual ed il rapport da gestiun ensemen culla proposta per l'utilisaziun dil gudogn.

C. Direcziun

Art. 21 Elecziun, cumposiziun e representanza

¹ Il cussegl d'administraziun elegia la direcziun, regla l'autorisaziun da representar ed il dretg da suttascriber e fixescha las pagas dalla direcziun.

² Ils commembers dalla direcziun astgan buc appartener il medem mument al cussegl d'administraziun.

Art. 22 Incumbensas

¹ La direcziun meina l'energia alpina tenor las directivas dil cussegl d'administraziun. Ella ei responsabla per affars tecnics ed administrativs sco era pils ulteriurs fatgs che pertuccan il menaschi dall'interpresa.

² La direcziun engascha il persunal necessari.

Art. 23 Cumpetenzas finanzialas

¹ Il cussegl d'administraziun fixescha las cumpetenzas finanzialas dalla direcziun.

² La direcziun sa delegar quellas cumpetenzas a singuls da ses commembers ni ad emploiai dall'energia alpina.

D. Revisiun dil quen

Art. 24 Il post da revisiun

¹ La suprastonza communal elegia in post da revisiun independent ch'ei specialisau sin revisiuns.

² La suprastonza communal sa incumbensar il medem post da revisiun duront maximalmein siat onns, sch'ils onns d'uffeci suondan in suenter l'auter.

³ L'elecziun succeda annualmein a caschun dalla tractaziun dil quen e dil rapport annual.

Art. 25 Examinaziun

¹ Il post da revisiun examinescha il quen annual e la bilanza.

² En cass ch'il post da revisiun constatescha a caschun dalla revisiun sbagls ni surpassaments gravionts dalla lescha, annunzia el quei a scret al cussegl d'administraziun sco era alla suprastonza communal.

³ Las incumbensas dil post da revisiun sedrezzan tenor las determinaziuns arisguard la revisiun dils quens dil dretg d'obligaziuns svizzer da societads acziunaras.

E. Persunal

Art. 26 Relaziun d'engaschament

Il persunal dall'energia alpina vegn engaschus sin basa dil dretg privat.

IV. Principis dalla finanziaziun

A. En general

Art. 27 Mieds finansials e possess

¹ L'energia alpina dispona d'in capital da dotaziun da frs. 1 milliun. Il capital da dotaziun impunda ella per ademplir sias incumbensas.

² Tuts indrezs d'infrastructura s'audan tier il possess dall'energia alpina, denter auter:

- a) ils indrezs per la produenziun d'energia;
- b) las reits;
- c) ed ils stabiliments.

Art. 28 Finanziaziun dil menaschi

¹ L'energia alpina cuviera ils cuosts dil menaschi cullas entradas ord sias prestaziuns. Tier quellas prestaziuns s'audan la furniziun d'energia, la purschida dils differents survetschs e l'ademplida dils mandats da prestaziun.

² L'energia alpina ei legitimada da decider autonomamein sur da sias finanziaziuns. En quei rom astga ella prender si capital jester.

Art. 29 Vendita ed externalisaziun

¹ La vendita da participaziuns e/ni da spartas acquistadas d'autras interpresas ei da suttametter tenor igl uorden da cumpetenzas dalla constituziun communal als organs corrispundents per la predeliberaziun ed approbaziun.

² Sur dil transferiment da spartas dall'energia alpina en interpresas independentas dil dretg public ni privat decida la radunonza da vischnaunca.

³ Sur dalla vendita dall'energia alpina ni da spartas da l'interpresa decidan ils votants e las votantas all'urna.

B. Tariffas ed indemnizaziuns

Art. 30 Principis

¹ L'energia alpina incassescha in'indemnizaziun per sias prestaziuns.

² Ella fixescha las tariffas per las prestaziuns publicas e las indemnizaziuns per las prestaziuns commercialas.

³ La fixaziun dalla tariffa d'electricitad e per l'utilisaziun dalla reit sedrezza tenor las determinaziuns dalla legislaziun federala davart dil provediment d'electricitad.

Art. 31 Tariffas per prestaziuns publicas

¹ L'energia alpina fixescha las suandontas tariffas:

- a) contribuziuns unicas per la cuvrida dils cuosts dalla reit e per la colligiazion d'in edifeci vida las reits per la distribuziun d'electricitad sco era per in rinforzament, in'extensium ni in remplazzament d'ina colligiazion;
- b) indemnizaziuns regularas per la furniziun dall'energia als consuments finals;
- c) indemnizaziuns regularas per l'utilisaziun dalla reit e dall'infrastructura per la distribuziun d'electricitad;
- d) taxas d'administraziun per lavurs administrativas e lavurs d'examinaziun.

² Sche relaziuns specialas ein avon maun, sa l'energia alpina stipular prestaziuns individualas e l'indemnizaziun per quellas en in contract culs consuments.

Art. 32 Colligiazion vida la reit

¹ Cullas contribuziuns ch'ei destinadas per la colligiazion vida la reit, vegnan ils cuosts per la construcziun dalla colligiazion nova naven dalla reit entochen tier il cunfin dil consument cuvretgs.

² Cullas contribuziuns ch'ei previdas per la cuvrida dils cuosts dalla reit, vegnan las investiziuns ella reit per la distribuziun d'electricidad finanziadas. Quellas contribuziuns cuvieran ina part comensurada dils cuosts dall'avertura generala e la gronda part dils cuosts dall'avertura detagliada.

³ Ils possessurs da schischom e las personas che possedan terren en dretg da baghegiar ein obligai da pagar las contribuziuns per la colligiazion vida la reit e las contribuziuns per la cuvrida dils cuosts dalla reit.

⁴ Las contribuziuns per la colligiazion vida la reit e las contribuziuns per la cuvrida dils cuosts dalla reit vegnan calculadas sin fundament d'in model da calculaziun ch'ei definaus ellas cundiziuns da fatschenta generalas dall'energia alpina.

Art. 33 Indemnisaziuns per prestaziuns commercialas

¹ L'energia alpina incassescha per las prestaziuns commercialas tenor artechel 12 indemnisaziuns conformas al marcau.

² L'indemnisaziun correspundenta per las prestaziuns sa era vegnir stipulada en in contract cugl incumbensader.

C. Rendaquen e concessiun

Art. 34 Presentaziun dalla contabilitad

¹ L'energia alpina meina in quen annual independent sin fundament dils principis commercialas. Igl onn da quen croda cugl onn calendar.

² L'energia alpina procura ch'ils cuosts e las prestaziuns dallas differentas spartas dall'interpresa ein transparents. Plinavon eis ella obligada d'impunder adequatamein ed a moda efficients ils mieds finansials disponibels. Quei succeda sin fundament d'in sistem da controlling adattau.

Art. 35 Taxa da concessiun, calculaziun, object e subject

¹ Per astgar far diever dil fons e terren public per la construcziun ed il menaschi dalla reit per la distribuziun d'electricidad indemnischa l'energia alpina la vischnaunca Tujetsch cun ina taxa annuala.

² La taxa annuala vegn calculada sin fundament dil quantum d'energia che vegn repartius ord la reit per la distribuziun multiplicaus cun ina tariffa da min. 0.6 raps entochen max. 2.4 raps per ura kilowat.

³ Sin fundament d'alineia 2 da quest artechel fixescha il cussegl da vischnaunca la tariffa sin proposta dalla suprastanza communal.

⁴ L'energia alpina ei legitimada da reparter quella taxa sils consumers finals. En quei cass ha ella da presentar quella taxa separadamein el quen dil consumer final tenor las determinaziuns federalas va-leivlas.

Art. 36 Adattaziuns

La vischnaunca Tujetsch sco concessiunaria ei legitimada da pretender da tut temps adattaziuns. Ella ei obligada da comunicar all'energia alpina eventualas adattaziuns che pertuccan la proxima perioda da quen sil pli tard entochen miez digl onn current.

V. Responsabladad

Art. 37 Responsabladad

L'energia alpina stat buna per las obligaziuns finanzialas sulettamein cun sia facultad.

VI. Execuziun e disposiziuns finalas

Art. 38 Execuziun

La suprastonza communal exequescha questa lescha e relai las disposiziuns necessarias.

Art. 39 Interpretaziun

La versiun romontscha ch'ei vegnida approbada dalla radunonza da vischnaunca dils ei decisiva per interpretar la lescha davart l'energia alpina dalla vischnaunca Tujetsch (lescha energia alpina).

Art. 40 Entrada en vigur

¹ Questa lescha entra en vigur igl 01-01-2020. Ella remplazza las statutas dall'energia alpina digl 01-07-2017 e la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricidad dils 16-03-2018.

² Cun l'entrada en vigur da questa lescha vegnan las statutas dall'energia alpina digl 01-07-2017 e la lescha davart l'indemnisaziun dalla vischnaunca Tujetsch per sias prestaziuns en connex cul provediment d'electricidad dils 16-03-2018 abolidas.